

四庫全書

集部

欽定四庫全書

盱江集卷三十七

宋 李覲 撰

近體

七言四韻

苦雨初霽

積陰為患恐沈綿
革去方驚造化權
天放舊光還日月
地將濃秀與山川
泥途漸少車聲活
林薄初乾果味全
寄語殘雲好知足
莫依河漢更油然

野人

村落蒼茫半草茅路無車轍水無橋婚姻取足唯春醪
鹽酪歸來待晚樵一樣寬衣疑效古幾人華髮未經徭
相逢不會寒溫語借問官家合是堯

書麻姑廟

流俗好仙方學道至人樂道自成仙飛昇若也由貪欲
紫府還應用詐權塵裏笙歌千古夢洞中星斗幾家天
無心便是歸真日姹女河車總謾傳

客有話故丁祕監京師舊宅因而傷之

等閒榮謝已愁聞况話三公極寵身青史尚為今世事
朱門不是舊時人文章散入諸蕃口花藥留添上國春
生死交情渾易見有誰過此為霑巾

五龍塘

世傳鱗物有蟠時分得寒泉住翠微天命雖教為潤澤
神心終是索虔祈一圍石岸刊無迹幾族陰雲禁不飛
風脚斗回波面黑向人渾似逞嚴威

寄小兒

兩世煢煢各一人

子無兄弟才生此兒三歲矣

生來且喜富精神欲

教齟齬從師學祇恐文章誤爾身
但有犁鋤終得飽莫看紈綺便嫌貧
不知別後啼多少苦問家僮說未真

季夏雨中宛有秋色四望之際百感生焉因題

於紙

粟花時節雨脩脩莫道如秋即是秋
客路幾千成大夢年華一半落東流
眼存將聖生前筆心得騷人格外愁

微物若教無所失塵埃猶願補嵩丘

秋懷

褚冠斜頂對清秋病骨支撐懶上樓
輔世功夫何日是少年滋味此生休
山含紅樹隨時老天帶黃昏一例愁
自笑酒腸空半在前村無處典鷄裘

書松陵唱和

天命相逢陸與皮當年才調兩權奇
朝端未有輸忠處詩外應無用力時
意古直摩軒昊頂言微都洩鬼神私

近來此道中興也泉下英魂知不知

七夕

天孫何許是來時月意惓惓露氣微可道星河難得過
自緣烏鵲合高飛秋宵已勝春宵短今會還如古會稀
早晚望夫能化石盡分人世作支機

早起有懷

草草西風動葛衣呼僮前啓竹間扉山僧好睡鐘聲晏
社戶多貧酒氣微豈是客愁渾較可祇因書卷解忘歸

盱江百里清無滓，枉屬閒人坐釣磯。

留題歸安尉凝碧堂

騷人得助是江山，千里幽懷一凭欄。
野色豈唯春晚秀，天風長似月邊寒。
身閒暫覺塵埃遠，境勝纔知宇宙寬。
祇恐仙壺提挈去，不教凡眼醉中看。

答張駿嘏

幾年江外恣荒唐，偶脫荷衣覘國光。
自是狂言無可擇，敢嗟賢路有相妨。
謾將文史為生業，已約漁樵共醉鄉。

多謝故人貽絕唱爰居寧解聽鏗鏘

清明日作

遲遲日景坐成曛聞說清明在此晨花卉不宜愁眼看
勾芒能為幾人春銷磨志氣多因老點檢交游半作塵
欲向醉鄉聊自適病來還厭舉杯頻

晚思

一檻東風小箔開亂山明暗水縈迴流年漸共春華去
暴熱還隨霽色來天氣濁多人欲睡地形卑甚物先梅

因知楚客迷魂處不是江東不足哀

暮春始遊城西

病多無力逐紛華三月衡門未見花
長恐後期成索寞果逢殘景獨咨嗟
欄干倚望山空在杯酒遲留日易斜
謾說明年更春色不知園囿屬誰家

寄傅代言

交游散盡客來稀門掩城隅晝漏遲
春地更無嫌草處雨天還有詐晴時
輕量世事世不罪冷笑人言人豈知

猶喜道途收拾早將閒對病最相宜

丙子冬至夜酒醒

盡道一陽初復時不期風雨更淒淒
凌辰出去逢人飲沈醉歸來滿馬泥
多恨恐成干斗氣欲言那得上天梯

韓文公月蝕詩有無梯可上天之句

燈青火冷睡半醒殘葉打窻烏夜啼

南齋詠風

懊惱南窻一道風只應天配與貧窮
不歸羅綺飄飄處故入松篁冷淡中
久座披襟塵榻穩半醒吹面月帷空

城邊菡萏今多少偷得清香是爾功

小雨

已是蛟龍未肯忙誰教蟬螭更相妨
來時槁葉疎疎響過後浮雲片片光
徑草微滋垂粉汗砌沙圓滴簇蜂房
嗟予不及高飛鳥先得天邊幾點涼

題淨居院

寺門幽獨傍江城江水清含地氣清
隔岸樓臺人醉死遶堦松竹夏寒生
路經橋遠塵難過僧占閒多俗不爭

唯有行吟憔悴客，這迴須去濯長纓。

清暉亭

池亭何處占清暉，只在暉江更向西。山上白雲如有雪，
水中明月似無泥。郊原不改春來秀，徑路終憂客到迷。
沈約東陽曾入詠，使君才調好留題。

往山舍道中作

截竹成輿不用輪，東行盡日穩宜身。前看疊嶂如無路，
每到平田始見人。下戶半曾差作役，朽株多已祀為神。

生涯一撮誠何有且免庸兒共拜塵

秋晚悲懷

漸老多憂百事忙天寒日短更心傷
數分紅色上黃葉一瞬曙光成夕陽
春水別來應到海小松生命合尋霜
壺中若逐仙翁去待看年華幾許長

殘葉

一樹摧殘幾片存欄邊為汝最傷神
休翻雨滴寒鳴夜曾抱花枝暖過春
與影有情唯日月遇紅無禮是泥塵

上陽宮女多詩思莫寄人間取次人

哭十姪

到官六月

一作日

寄書迴未病封題死後開一命至卑人

盡得九泉何事獨相催唯憂旅櫬還鄉遠况是親喪繼
踵來數世學文終若此可憐門戶轉隳頽

秋陰

一夜風聲曉更狂起來庭戶頓淒涼不知紅日在何處
時見黑雲微有光天落水中兼鴈影露啼林罅帶楓香

愁人莫苦登高閣說著江山已斷腸

寄介夫

天恨吾儕各一方夕陽千度到西窻因循流俗今皆是
磊落如君信少雙書未隔年難得報心從薄宦始應降
可憐漢水無拘係長與盱江會九江

書懷寄介夫

棄材幸免雜輿薪收拾緇衣出洛塵漸老得閒纔是性
謾言成詭且隨人能傳身後須文字要識胸中只鬼神

俗子不勞輕毀譽問天長乞醉鄉春

關徐

雲長不絕舊君情元直終隨老母行立效報公何感慨
指心辭主更分明三方本以兵攻戰一士能為國重輕
多謝曹劉存大度任教忠孝得成名

送張宏下第南歸

世家元是武夷孫四上觀光預國賓地底豈無干斗氣
天邊爭奈飲牛人田宜秣稻應多酒路入溪山漸少塵

身計未諧歸計好一樽猶可醉鄉鄰

葛陂逢何道士

十數年前別我行相逢猶是舊顏形
琴聲漸古聽來淡藥味雖凡試最靈
出有酒錢天下富住無家地浪頭萍
神仙可學應須學萬里蓬萊一點青

俞秀才山風亭小飲

炎炎千室熱如烘亭壓山頭獨有風
雨意生獰雲彩黑秋容細碎樹枝紅
半天斜日歸心動一面平川醉眼空

却是夢魂無所得人間豈少翠微宮

謝宋屯田見示永平錄海南編

多少儒衣只假塗貴來誰肯更觀書其間或以文爭勝
未見如君識有餘長把六經為準的最應三代是權輿
可憐後世名空在直釣而今豈得魚

閩中歲暮

休道南人暖過冬苦寒今與北方同霜嚴欲裂地到底
日短不行天正中誰使智愚相伴老便將榮辱斷還空

鄉愁莫更欺閒客薄酒從來亦有功

白樂天有
酒功贊

送侯殿直之官吉州

待詔何年別玉堂筆端渾欲繼鍾王官資未出風塵外
蹤迹曾親日月光扶老只今非遠道薦能從此有封章

廬陵若要高文寫爭得滁州在故鄉

滁州歐陽使
君廬陵人也

偶題饒秀才谿光亭

北出城來駐馬蹄君家別館幸臨谿雄虹見雨過不斷
潦水到秋痕漸低萬事熱心成浩歎一樽撩眼怕長迷

俗人誰會儒生意是處醉吟還日西

宗人宅仁知閣

江南盡是山水地君子固求仁知名可憐塵土不到眼
只有雲泉相伴清人間擾擾知何在日暮悠悠空鬪行
明月一欄風一枕醉鄉猶可過浮生

早夏偶作

閒愁不覺過年光強半精神似醉鄉幾度雨來成惡熱
有時雲斷見斜陽古人事業塵空滿故國園林草自長

賴得南華憐我病一篇齊物勝醫方

匈奴傳

漢家經武意如何也信狼心欲偃戈豈是虜庭佳麗少
自緣婚禮貨財多女從宗室方掄擇賦出齊民更刮摩
若向大臣求姪媵當時誰肯議通和

忠武侯

齊霸燕強舊有基當年管樂易為奇何如新野羈栖後
正值曹公挾帝時指畫二州收漢燼安排八陣與天期

才高命短雖無奈猶勝隆中世不知

次韻答陳殿丞見寄

顛倒江湖二十春干時的是妄庸人先容不肯收蟠木
高足無從得要津衆與善名酬苦志莫將吟味養閒身
食田飲井知誰力下有驕兒上有親

贈韓侍禁

閱閱山西舊將家一官淪落向天涯目皮相處應難識
髀肉生來只自嗟野圃幾年飢虎豹旱雷何日起龍蛇

吳歌楚舞時相慰
劍鋏梅乾鐵有花

送沈秘校

君家龍虎弟兄賢
斗酒相逢楚水邊
雨露自今榮一命
塵埃未免困三年
高談欲出稠人右
敏政當居俗吏前
異日能來見逋客
麻姑碧洞古時天

寄題錢塘毛氏西湖園

昔年曾泛西湖流
君今更住西湖頭
人生多是未得往
地上有天何處求
朱樓照影鐘磬曉
畫船落手芙蓉秋

鯉魚赤鱗應不少待與水仙相伴遊

自解

人生何苦要多才百慮攢心摘不開
夜月幾曾無夢處春風只管送愁來
禿毫強會悠悠事浮世無過滿滿盃
看取秦坑烟焰裏是非同作一杯灰

不寐

四壁空空絕語聲困來終是睡難成
孤燈要與人相背寒漏苦教天不明
累月故園無信息幾般閒事惱心情

別愁若解生華髮一夕應添一萬莖

韓偓集有自撫州往南城縣舟行見拂水菖蕖
之詩南城吾鄉也因題八句

韓偓當年赴七閩舟行過此倍凝神江邊石上知誰處
綠戰紅酣別是春往事幾多書不記仙源依舊地無塵
花光柳色今何限更有才人勝古人

代書答陳次公

咄咄休休一世閒百年都是浪悲歡高談不待傍人笑

立事須知自古難時見老顏來鑑裏已將生計託雲端
六鼇未可揮刀斫肯便臨谿把釣竿

來書以俗子疑予
求人慰薦故有是

答

和君賜題堯輔齋壁

書林老仙頭欲斑近日卜居吳楚間麻姑世界盡贏得
羲皇興味先追還川流切對夏無暑山月出來門未關
笑殺區區躁求者不因貧病不曾閒

送王都曹

古木亭邊夜響昌
晨餞壺重疊擁雙輪
高文健筆科場手
白髮青衫宦路人
十月霜風還劈面
六街塵土會欺貧
麻源碧澗神仙地
早晚歸來伴隱淪

送危太博

一片靈臺衆共知
宦途寧肯避危機
至誠似有神明助
盡室初從瘴海歸
烈火豈能傷美寶
覆盆終是見炎暉
人生未出功名外
多少京塵待染衣

題虞侍禁山亭

嶺上欄楹締構新我來登望倍凝神可憐韜畧真名將
猶與谿山作主人會把松心欺過雪更憑花萼占留春
江南風物雖佳麗爭奈燕然有虜塵

君錫宰壽春

淪落多愁笑不成水邊還是送君行官為令長前程好
地近鄉關喜氣生
百里有人觀惠術三年唯我見交情
山中後夜思賢處風月猶應似舊清

錢寺丞知白州

大邑歌謠日尚新，忽驚千騎擁行塵。
宦游莫歎登長道，天意先教福遠人。
城在海隅門少客，地鍾陽氣景常春。
政成不患無知己，按察當今正直臣。

集賢杜公
出使廣西

次韻答史太博

驛使將詩訪遠山，發函寧暇正衣冠。
秦城未割難論價，燕谷纔吹已不寒。
佔畢有心忘老至，惰農無罰賀恩寬。
一枝數粒唯知分，豈是明時學考槃。

蟬

一蛻囂塵向此生柳枯槐老正傷情
高吟盡日知誰聽
零露充腸且獨清
螿斧不勞陰致害
貂冠猶可共傳名
騷人若有遺魂在
應放寬聲伴爾鳴

寄史屯田

秀汝清旴數舍中
繫匏名謁竟難通
只知俗吏隆官業
不意高文有古風
朝請待趨天屏北
家園歸省浙江東
遠民利害聞應熟
早晚嘉謀沃舜聰

答丘寺丞示月蝕詩

一夜吟公月蝕詩睡魔驚走醉魂飛如將混沌重區別
要使君臣有等威天道至高全指掌古人雖死合知非
相思無計能相見何日軒車向北歸

蓬屋

長簷數尺庇堂東疎漏從來只有蓬日影碎如秋樹下
雨聲初似夜船中竹經蠹了多垂地箬到乾時半捲空
此處想非人所競衆言千萬莫相攻

堦基

堂前一級似堦墀無石無甃只舊基泥飾頃因年節近
蹋崩唯是客行時誰曾羅襪雙來上多謝蒼苔久不離
從此便成貧景致竹簾垂處最相宜

宜春臺

謫官誰住小蓬萊唯有宜春有古臺千里待看毫末去
萬家攢作畫圖來雲中羅綺香風落月底笙歌醉夢迴
莫恠江山苦相助騷人沒後得真才

東湖

古郡城池已瞰江重湖更在郡東方水仙坐下魚鱗赤
龍女門前橘樹香路絕塵埃非灑掃地無風雨亦清涼
使君待客多娛樂只有醒時覺異鄉

送趙拊

祖諱
湘

先朝名士有遺孫狼籍麻衣化洛塵筆下每求千古意
醉中曾過幾迴春勞生只見年年老客路相逢事事新
滿座狂歌時莫笑眼看燕市若無人

太平州十詠亭

客遊無日暫開顏
姑孰谿邊偶得閒
風景直疑圖畫出
古今都似夢魂間
桓溫罪逆休重問
謝傅英靈已不還
深美謫仙遺世務
酒船椎鼓浪如山

送王尉

義激中心不再思
宦途從此抱瑕疵
誰憐君子篤親意
况是明王孝治時
靖節田園應久廢
尚平婚嫁豈宜遲
一官塵土休迴顧
海上羣鷗舊有期

野意亭

福唐城郭掌中窺
旭日登臨到落暉
誰在畫簾沽酒處
幾多鳴櫓趁潮歸
晴來海色依稀辨
醉後鄉愁積漸微
山鳥不知紅粉好
纔聞歌板便驚飛

靈源洞

纔出塵來尚未知
漸攀藤竹漸臨危
伏流似是龍藏處
古樹應無春到時
誰把石崖齊剝削
直教雲氣當簾帷
良工畫得猶宜秘
莫與凡夫肉眼窺

送陳司理

平生直道恥求人下位沈英久未伸齊吹古來偏有濫
葉龍今更不宜真天邊奕世三台貴江上先廬一畝貧
大抵窮通相倚伏這迴寒谷解逢春

送黃承伯

君來別我向番陽時節初春曉尚霜荼褐園林新柳色
鹿胎田地落梅香此行硯席多知己是處樓臺可舉觴
只恐詔書非久下槐花又在眼前黃

謝蔡十八丈相示詩卷

昔年多幸枉高軒示我新詩累百篇使者即時還趙壁
夢魂今尚憶鈞天據鞍馬援誰云老陋巷顏回始是賢
桂樹寒山風景好近來應更有長編

清話堂詩

至和元年秋九月與周伯達宿景德寺義明
上人房子熹誦李涉詩云無限心中不平事
一宵清話又成空其意與今夕相似因目其
處為清話堂且題八句

釋子相延暫解冠一宵清話到更闌
漆盤香燼死蚯蚓
紙瓦雨聲鳴彈丸往事莫將閒口笑
勞生誰在定中看
明朝頰面還歸去依舊塗泥濺馬鞍

送郴縣吳主簿

數十年來預薦書當時文行聳羣儒
青衫近始霑王澤
白首從新入宦途四壁生涯雖寂寞
一官趨進轉崎嶇
楚南若是江山好閒日猶應味道腴

覽余堯輔詩因成七言四韻

少年心苦向毛錐
老大生涯只有詩
哀樂萬端成畫續
江山太半入鑪錘
格如平易人多愛
意到幽深鬼未知
白髮尚新才不盡
幾時吟興是衰時

次韻酬屯田陳丈見寄

老年纔到病還催
老病成叢撥不開
腹冷有時如咽雪
耳虛終日獨聞雷
半生辛苦歸三徑
萬恨銷磨向一栳
賴得竹窻無事處
清風頻共故人來

同徐殿丞遊麻姑山陳屯田聞之以詩見寄次

韻第二首

塵寰漸遠漸淒清似向崑崙采玉英此地已知鄰華子
幾人猶道識方平步高那復肌膚重心逸都疑羽翼生
苦恨俗緣無了處歸來依舊馬蹄聲

和陳屯田送知縣徐殿丞次韻

近年雙闕暫鳴珂出宰南城戶數多古道存心公道顯
惡人鉗口善人歌登高賦處英辭在垂索歸時舊物鉞
當比瑞金囂訟後要移風俗擬如何

和屯田陳丈寄唐休次韻

白屋從來未有官，一名須作佛名看。
彥倫北谷重歸去，安石東山足舊歡。
常調幾時趨鳳闕，湛恩唯待立雞竿。
胷中况是多奇蘊，自此陽春退苦寒。

和王刑部遊仙都觀

尋幽西去路非賒，回首紅塵事可嗟。
不待鸞駟并鶴駕，便分人世與仙家。
幾函道藏金壺墨，一片秋容玉井花。
還似武夷高會日，骨凡猶幸醉流霞。

和遊丹霞有懷歸之意


暫時來訪道家流，肯伴煙蘿滯一丘。
為憶長安瞻日下，欲尋蓬島向鰲頭。
陶潛醉後雖眠石，王粲憂多更上樓。
宣室歲餘虛席在，青山何路更重遊。

七言八韻

送知軍曹比部移虔州

要知賢者善居官，法自嚴明性自寬。
黠吏欲欺難作計，愚民初懼久方安。
獄辭大小情皆見，市物公私價一般。

農力不聞供土木窮閭猶得免飢寒皇為二使來巡撫
攷未三年悉可觀劇郡便當煩鎮守君恩寧許更盤桓
兩轡贛水行非遠五袴盱江日漸單從此天衢龍躍去
野人懷德謾悲酸



盱江集卷三十七

欽定四庫全書

集部
盱江外集卷一至三

詳校官庶吉士_臣李如筠

檢討_臣何思鈞覆勘

總校官進士_臣楊懋珩

校對官助教_臣羅萬選

謄錄監生_臣毛 祀

謄錄監生_臣姚培雯

欽定四庫全書

盱江外集卷一

告劄 告詞二 劄子四

薦章三首

告詞

勅建昌軍草澤李觀藩臣仲淹以觀所著文二十四篇
來上子俾禁掖近侍詳較皆曰學業優議論正有立言
之體且履行修整誠如薦章所云故特以一命及爾爾
其益自進于道勿患朝廷之不知也可特授將仕郎試

太學助教不理選限皇祐二年七月 日

勅將仕郎試太學助教說書李觀夫大學者朕所以出教化而賢士之所由進行誼也師儒之官可輕授乎爾醇明茂美通于經術東南士人推以為冠自佐學政逾年于茲孜孜渠渠務恪厥守祭酒司業以為博士之職莫宜于爾是用推恩爾其悉心使諸生矻矻興于廉讓而服于教訓則其善也可特授通州海門縣主簿太學說書散官如故嘉祐三年七月 日

劄子

國子監奏伏覩試太學助教李觀素負才學博通經史
嘗應制科舉雖因名臣薦論命以試官不需政祿而養
道丘壑聚徒教授南方士流皆宗師之欲望朝廷特與
注授一官差充太學說書所冀有裨庠序風化之職如
蒙擢用後犯入已贓及不如舉其本監主判管幹官並
甘同罪候勅旨會問到國子監稱李觀在建昌軍或在
撫州奉聖旨李觀令赴太學供職劄下江南西路轉運

司指揮發來赴闕仍仰見在處支賜盤纏錢伍拾貫文
右劄付李觀

國子監奏據屯田員外郎充直講楚泰等狀伏見大理
寺丞篆石經張次立素有學術深通經義俾居講席足
厚素風泰等欲乞補充直講填殿中丞孫復闕當監體
量得本官實有學行深明經藝竒補講員伏乞朝廷特
賜差補如蒙擢用後犯入已贓管幹主判官並甘同罪
候勅旨續據國子監奏已保舉張次立充直講填孫復

闕竊慮未依得自來條制竊見試祕書省校書郎文勸
劉隸素有履行通經術堪充國子監直講填孫復闕候
勅旨勘會太學助教李覲已奉聖旨令赴太學供職檢
會令文太學助教掌貳博士事分經教授右奉聖旨宜
令李覲依前降指揮赴學供職其孫復名闕更不差人
所舉張次立等不行右劄付李覲准此

太子中允充天章閣侍講兼管幹太學胡瑗奏為臣多
疾乞於通州泰州秀州漣水軍無為軍江陰軍廣德軍

除臣一差遣候勅旨奉聖旨胡瑗再與假將理仍差李
覲權同管幹太學右劄付李覲

國子監奏據通州海門縣主簿太學說書權同管幹太
學李覲狀為有祖母墳在建昌軍未祔先塋今欲請假
往彼遷葬申乞指揮所據李覲狀候勅旨奉聖旨依奏
除程給假一月不得有違日限所有太學公事仍仰鄭
穆權管幹李覲回日仍舊右劄付李覲准此

薦章

范文正公二首

右臣聞聖人坐以待旦旁求俊乂蓋將盡天下之才成
天下之務故為臣者以舉善為忠亦將竭知人之明副
待旦之意也臣親逢聖辰嘗忝近輔輒慕前修之節少
答非常之遇臣伏見建昌軍草澤李覲前應制科首被
召試有司失之遂退而隱竭力養親不復干祿鄉曲俊
異從而師之善講論六經辯博明達釋然見聖人之旨
著書立言有孟軻揚雄之風義實無愧於天下之士而

朝廷未賜采收識者嗟惜可謂遺逸者矣臣竊見往年處州草澤周啓明工於詞藻又江寧府草澤張元用及近年益州草澤龍昌期並老於經術此三人者皆蒙朝廷特除京官以示獎勵臣觀李觀於經術文章實能兼富今草澤中未見其比非獨臣知此人朝廷士大夫亦多知之臣今取到本人所業禮論七篇明堂定制圖序一篇平土書三篇易論十三篇共二十四篇編為一十卷謹繕寫上進伏乞聖慈當乙夜之勤一賜御覽則知

斯人之才之學非常儒也其人以母老不願仕宦伏乞
朝廷優賜就除一官許令侍養亦可光其道業榮於閭
里以明聖人在上下無遺才若不如舉狀臣甘重受朝
典謹具狀奏聞伏候勅旨皇祐元年十一月二十日

臣伏見建昌軍草澤李覲十餘年前曾撰明堂圖并序
一首大約言周家之制見於月令及考工記大戴禮而
三家之說少異古今惑之覲能研精其書會同大義按
而視之可以制作臣於去年十一月錄進前人所業十

卷其明堂圖序為一卷必在兩制看詳今朝廷行此大禮千載一時何斯人學古之心上契聖作臣今再錄其圖并序上進伏望特賜聖覽於朝廷討論之際庶有所補仍乞羣臣前奏殊加天獎以勸儒林取進止六月

日

余侍郎一首

具銜臣余靖伏覩先降勅節文賢良方正能直言極諫并高蹈丘園等科並許少卿監已上及本路轉運使副

逐處長吏奏舉者右謹具如前臣竊見建昌軍草澤李
覲博學通識包括古今潛心著書研極治亂江南儒士
共所師法曾於慶厯元年應茂材異等科祕閣召試下
第退居鄉里四方生徒從之講習有此寒畯淹在草萊
於臣鄰封不敢緘蔽臣又伏見草澤邵亢與覲同時就
試後來亢以臣寮奏舉已授職官今覲退居獨未蒙用
伏乞朝廷特與召試以廣得賢之路謹具狀奏聞伏候

勅旨

盱江外集卷一

欽定四庫全書

盱江外集卷二

名公手書

范文正公

仲淹白秀才李君在郡陽勞惠訪尋以改郡不敢奉邀
今潤州初建郡學可能屈節教授又慮遠來難為將家
蘇州掌學胡瑗祕校見明堂圖亦甚奉仰或能挈家必
有經畫請先示音為幸保愛保愛不宣仲淹上李君竒

士足下八月十九日

仲淹頓首秀才仁弟別來傾渴無已想至仙鄉拜慶外
無恙此中佳山水府學中有三十餘人闕講貫與監郡
諸官議無如請先生之來必不奉誤誠於禮中大有請
益處至願至願不宣仲淹上秀才仁弟十月十九日

小簡

此地比丹陽又似閒暇可以卜居請一來講說因以圖
之誠衆望也誠衆望也兒子在蘇州足下可能早來今

冬欲行鄉飲俟先生講求也仲淹上

仲淹白中間辱教承已拜恩命雖德業雅遠未稱人望
而朝廷獎善鴻漸于時惟聰明精至曉之深矣未相會
間千萬自愛自愛不宣仲淹上太學先生閏十一月二

十八日

小簡

仲淹已受勅改青州見理舟行次希善侍加愛

孫觀文

沔啓錢塘幸獲瞻對以扶護過江不果欵接後聞談經于府中恨不得執卷座末益為企戀企戀近日諒雅候無恙沔冬中襄事畢正初詣杭如文蓋盤旋必良會矣冬溫旅次希保愛保愛因王先生行草草上問不次沔拜上建昌李君先生之右二十三日夜

沔白人來捧書伏知旅中無恙示及南歸未知奉會之時企戀企戀途中慎護冬寒希保愛保愛人迴草草奉此咨問兼謝伏惟照察不次沔拜上先生李君之右二

十一日

汚白錢塘之別又二載餘後未獲良會復疎致問專介
遠來惠書且知居憂無恙示教民病數十條非留心博
愛何以及此以賊未定過嶺經制必未及一一行下當
擇要以施之春後賊定方到江西奉見矣示及事不須
如此何害冬寒保愛保愛草草上問兼謝不宣汚上太
學先生李君十二月九日希文夏中過徐遂不肯行以
後事見託一一如其志哀痛哀痛行狀乃勉為述之忙

中未及以草寄去

余侍郎

靖頓首李君秀才別來每增翹渴忽枉手跡備荷勤至
於邑鄙吝渙釋懷抱所示禮論七篇推進禮經準的世
教派仁義贄刑政正其本於禮成一家之言工古人之
未工導明王之要道豈止獨步江表校聲名於後俊者
哉開益蒙蔽不勝降歎人回謹此為謝不宣將作監丞
余靖白正月十四日

靖頓首近接緒言止于再見蘭游霧息未盡雅懷所示
上豫章守書可以激昂士範支梧頽圯健美健美別來
鬱鬱動不如意邈然風規每益牢吝忽枉手牘深認勤
勤木脫火流切希進道外保愛是祝謹奉簡陳謝不宣
大匠丞余靖頓首李君秀才七月二十八日

靖啓靖屏居南夏久不相知及今得書乃審有太學之
授國家誠有憐才之意而不置於可用之途何哉道遠
未由胥會徒益傾渴耳冬寒保重人迴謹此為謝不宣

靖手啓助教執事十月十日

如有朝命名赴成均供職亦可行道不宜辭免或令赴
選須詳去就也靖啓

歐陽內翰

修啓冗事牽迫久疎奉長者之論不知兩辱過門甚媿
甚媿修來日有少事須出即今幸家居可以拂席奉俟
軒蓋顯企顯企不然當別拜聞貴不失約也修頓首賢
良先生

蔡密學

襄頓首啓襄才識不能過人天子誤知擢置諫列每自
念孤賤之迹旁無尋尺之助一旦名徹萬乘而收錄之
此宜如何論報効之誠也示及庸奴非所謂難言但未
得其詳耳足下業已發之當為予究之至詢他人果詐
不虛必逃去矣就令不逃亦生姦計莫如密得其詳摘
之以置于法於時不為無補行路疲憊草草裁答足下
取其意畧其禮也襄頓首啓二十三日夜

襄啓近承從者之勞過臨海郡適以久疾無悰為禮疎畧遽此離間豈勝慚跂慚跂春寒道上愛護為佳不宣
襄頓首李君足下二十日

馬雜端

遵頓首啓彛吏京邑日與權幸人為敵趣了目前力有不逮千里修問病未能也未幾以罪逆復丁家難扶挽南歸備嘗艱厄甫達里中即襄大事即日僅餘殘息無復生意忽辱來諭承家居安甚併為慰也知非久游錢

塘且有迂顧之意何幸如之遵近得彼信將來亦當一
詣目即有私冗未幹兼本郡守尉故人同年累書相招
受代伊邇若捨饒而趨杭不免去就厚薄之責頗非人
情當暫謁之不知行期遲疾近遠掃榻聯鑣俱未敢必
靈隱西湖之會當不蹉跌矣秋暑自愛倉遽草此不次
遵頓首上答泰伯先生足下七月十一日手啓

遵再拜奉別數年居常企咏以家禍屏居僻左無階修
問比見卿材具得起居之實所慰多也遵無他奇區區

徇祿食當求南中一官以便安與盱江乃素心未知所
願果否前月已被臺移明日上路咫尺不克一趨師坐
少冀誨言為恨甚深因風示字欲知動止息卒聊此上
謝夏暑切自愛傾渴傾渴遵不勝私心不宣遵再拜奉
伯先生書八十五日謹簡

遵悚仄遵到淮南二年矣署而居者不數月奔走之勞
不可勝道以故僅了目前四方交游書問闕如也或云
先生居倚廬聞問不審有失陳慰人來得書伏承孝履

支裕先生未起有識惋惜遵素性朴愚上下窘困之際
乃佐此局各責日深先生有聞無惜見教涉夏勉抑自
愛人回聊此為謝餘俟後信多悉多悉不宣遵悚仄再
拜泰伯先生大孝服次三月二十八日

蕭閣副

十一月望日長沙野人蕭注致書隴西泰伯先生足下
注昨偕弟英求舉于京師聞足下應賢良預第一人召
試是時萬口一發萬意一同未有不心思目願欲識其

面者一日英請於叟曰李泰伯預賢良名未知其道果如何叟曰今之賢良異於古泰伯其為今之賢良古之賢良耶若為今之賢良則天下可車載為古之賢良則覆載無三四英曰敢原其賢良之今古曰今之賢良所學者美身之具也口誦之心記之然後分句讀辨訓詁數條目駕虛辭而強名曰策曰論主司既不能別白則互曰彼人之富於學也此人之富其才也上既取之下思習之中其選者十年間往往陶天下之民嗚呼以斯

術而致吾君陶吾民則虫蝗水旱盜賊不作其可得乎
古之賢良發其言則為箴為規為教為化明陰陽倚伏
灾異變盈之事提耳萬乘擯斥克黨亂臣賊子不敢正
目而視使三王之風復見于當世故漢之文景可比周
之成康者由斯道也叟尋與英下第南歸聞足下不中
選二心頗疑後得足下退居集啓而讀之則知足下果
非今之所舉賢良之人其不中選則宜夫人之相知患
其道不同道同雖夷貊亦可為兄弟注鄙人然而有志

於聖賢之術心銘足下之道故發此書以聞非今之趨
炎附勢輩聞足下有大名而沽相知之幸足下其以為
是非里人葉國器歸旅中草草非書冀留意不宣注再
拜

小簡

注頓首前書寫意茲不云云相慕之極旦夕常在家貧
至甚僕馬無具因而幸見賢之望噫進不得地退無以
居丈夫之心於此將盡有風西來書以為寄則野人之

請餘希自愛注再啓

祖學士

無擇再拜泰伯先生酷熱以來氣體何如驛置相望不
遠千里無階披奉祇增詹企法掾連君錫僕之故人有
文而善與人交泰伯見之當相得以驩矣千萬善愛慰
此多憶無擇手記頓首泰伯先生六月十七日

無擇啓累日前軍校過敝邑得泰伯所示書承起居無
它為慰甚深也慶歷民言皆極當時之病真醫國之書

耳使今相天子宰天下者聞其言而行之何憂乎獯粥
何患乎拓跋氏邪無擇踈賤不得言於朝泰伯又俾附
寄永叔即須良便致之也君錫行日曾託奉書必得通
上無擇近作愛堂銘與文爽序在君錫處宜枉觀覽因
風幸示可否之教秋暑千萬善愛不宣無擇再拜二十

六日

無擇自來淮楚以地遠且少便復吏事無餘暇故不得
時時拜書徒日思頌亡已足下之門人高弟者曰陳生

過聽不佞遣介走數千里惠然以書見抵且示之策捧
覽之際覲生面目茲足下之不鄙遺我而俾之相示也
顧愚何足以當之推轂之教豈敢不勉趨奉未由惟祝
善愛諸懇可期面會茲不能布萬一無擇再拜泰伯足
下四月九日淮上書

無擇再拜泰伯先生無擇嚮者居憂丹陽辱書者再兼
承見寄長篇及賦不任感仰然以道塗阻遠少遇信便
無階致誠而望風依依靡忘終食也去歲過洪井見建

昌牙校首詢動止且將附問乃先生赴范杭州召已行矣又不得通區區于左右今陳秀才人來捧所貺手尺具悉起居如宜差慰詹渴萬一無擇方此奔走披晤未日仰慚千萬為道自愛愚懷所望無擇再拜泰伯先生無擇再拜泰伯先生言念久不附問惟劇詹馳夏末抵表即欲致記竊承軒車寓泊洪井及詢諸相識乃云它適蓋傳聞之不得審的耳介至忽捧手墨承體局休佳殊慰區區敝郡已作學更三兩月可成當須坐邀長者

來此為後生唱導也乃時專遣人禮請次謹先此咨露
秋涼希千萬若時加愛懇懇無擇再拜八月二十三日

李侍郎

淑白近承雅顧獲奉嘉談兼執雄文重將厚意欽降之
切昕夕以之忽辱手緘承有小疾戒舟涉遠幸保沖襟
惟精學之邁倫固憎迷之詎測汶圖魯會議空祕家楹之
藏洞簫上林猶慙侍臣之薦興言瞻聳交集下誠不宣
淑頓首

孔宗旦

宗旦啓自京師為別迨四年矣每聆風聲鄙氣銷爍伏承日來體休道洽師表江左捐棄名場沉蘊事業易曰肥遁無不利惟泰伯之道乎其善其善今二十二日徂徠石守道卒嗚呼天喪吾道俾我先生短命死矣泰伯能不痛悼哉秋風蕭條江山修邈願固顏色以厭怛但子靜行次聊此起居惟少垂察不宣曲阜孔宗旦啓

盱江外集卷二

欽定四庫全書

盱江外集卷三

序詩墓銘

張學士送李君南歸序

宗古

三代以還漢唐為盛孝武雖講求三雍之制而迂儒駕說怪誕而不經有唐貞觀開元幾于治古雖希闕畢講而明堂之議寂寥而無詔國家承百王之餘夷僭黜暴典章法則洪鬯純備然往者挾佞之臣讀儒書被儒服

一旦得貴位則誘導上心務極土木以崇釋老斤斧既息流竄亦至後之卿相勤恤民力以實邦本合宮之作我故未暇也惜乎自周室距今曠千餘載此禮廢絕隔于耳目所以學者各是已見競牽師習若詩分傳離愈失愈遠天豈使三王經制將遂泯乎故復出泰伯以明其本泰伯家江西嗜古學以謂今天子享上帝朝諸侯雖有其禮而無其位迺潛心憤悱貫覽數家之說自周官考工記大戴禮盛德篇禮記月令漢白虎諸儒及歷

代論議參總會一稽同合異曲者暢之滯者通之為明
堂定制圖一篇并序凡數千言竭來京師摯見時彥若
李宋二紫微左史聶長孺集賢葉道卿皆盱衡接納鄭
重推許可獻公車登乙覽補朝廷之闕當晨奏而暮召
泰伯猶謙謙不處罔敢露才而自薦也會貢舉罷詔
髦有懷親之感歸艤泊渚拱袂言別余恐江西英俊未
盡知泰伯之道及中朝士大夫稱詠所以然故筆為序
以送之異日舉修墜典咨謀折衷泰伯必攘袂危冠羣

立高議與宿儒故老較辨于赤墀矣斯言不誣故乏輝
潤謹序

葉內翰詩

清臣啓累日前伏蒙袖書臨訪并小文編及
明堂圖披玩尋繹彌增景服偶書二百四十
言以伸謝臆伏惟采摭

進士不讀書明經不根義詬病君子儒于今作文弊禮
部右詞賦諸生竊科第從道不違人追趨斯近利孛生

何為者力學務遜志羞恥事章句深湛刺經藝常惟天子貴無大明堂位邈焉三代風尠矣百世繼去聖日愈遠攻端非共致公玉既妄圖戴德亦繆記漢唐盛衰典規畫不足示其間區區者何暇盛德事確論無其高闊講寢而墜披文會今古援筆攷同異面勢本周官纖悉探呂氏俛拾林甫長仰摘康成盤昭發老生矇冥符作者意聖期接千統緝禮恢萬祀無文既已秩同節此云備寧當總章法未學雲臺議廢興有時合聰明自民視

成厦繫衆材致理豈一士南闕朝奏書中朝夕鳴佩行
矣無自遺日中今可斐

祖學士詩

奉和泰伯送春絕句繕寫寄呈幸垂笑覽

憶昨相逢甲午年與君同賦送春篇等閒又見春風老
更捧新吟一惘然

萬樹紅芳落漸稀浮榮能得幾多時孤根未識陽和力
春去春來兩不知

送春長句呈泰伯先生

晝日臨風把酒卮宜春臺上送春歸已看綠樹惜惜靜
猶有殘花怱怱飛歲月任從隨手過功名未必與心違
我緣客宦無常處後會如今亦恐稀

無擇啓前日承泰伯先生寵示新詩三首謹依
嚴韻奉和幸賜采覽

異鄉何處散幽懷賴得城中百尺臺還向天涯經歲住
那知春色為誰來雪消江上看梅發風暖衡陽有鴈回

強擬登高聊賦詠再三愧乏楚人才右宜春臺

晴煙翠歷澹湖光勢勝居然占一方拂水萬絲楊柳弱
倚風千蓋芰荷香縱遊閒汎蘭舟穩半醉狂眠石席涼
公退每來須度日却疑身出利名鄉右東湖

九十日春今日盡送春何況我偏知後期只在經殘臘
重探梅開雪裏枝右送春

寄李先生

黃先生晞

久不見泰伯中心頻損和近聞束書卷更卜好山阿學

古成儒癖敦風蕩俗訛周公法已矣原憲事如何母老
祿未及身閒鬢不皤新文海裔播舊業釣竿拖甯戚歌
寧發麻姑使屢過時人一握小吾道片雲多友弟俱游
宦池樊自撫莎聞猿詩興逸敲戶酒徒羅鄉里名光也
朝廷禮後麼年來魚信至怪我客蹉跎

麻姑山一首贈陳仲父賢良兼泰伯先生

黃寺丞通

麻姑山直斗牛角形勝擁斷東南隅五百年來畜英氣

特為吾宋生真儒李姓觀名泰伯字風骨古秀飄髯鬚
其人於世少似者無乃稷契荀孟徒自傷出處苦竒剥
不得寸祿遮妻孥歸來築室郡北郭反關唯作文字娛
先生之門足高第中間仲父有輩無曾繼先生列科舉
簡編滿載三十車先生不遇子亦退高文懿行夸江湖
麻源谷口田數頃歲計取足無贏餘生涯俯就隱意決
便棄城邑廬郊墟上有慈親享甘旨下有子弟森庭除
平生胷臆渺溟渤惟學虞卿窮著書平生志氣薄雲漢

惟學子陵閭釣魚每當春秋社時候萬象瀟洒神仙居
品花野卉照几席溪風谷靄清襟裾先生乘興或還往
殺雞炊黍開尊壺共評古今正經史不知口角清涎濡
名教果有如是樂彥輔之言誠豈誣蓮社竹谿詫高逸
究竟未免歸狂愚爭如仲父與泰伯相樂以道情愉愉
丈酒逢迎二十載一日不見已為疎松門大開俗不到
水雲軒檻空清虛仰愛二友嗟不與欲別仙墅猶踟躕

先生墓誌銘

并序

門人

陳次公

撰

有宋經明行修道德沈純用則任公卿尸教化而不用以夫子之道教授學者門人陞錄千有餘人有如游夏者則其賢可知也已文章高於當世版而行之凡數集每為歌詩誌表未嘗以一字借人而人自求而得之皆自言曰如此為父兄求而得之皆自言曰父兄如此下筆多典故世莫及也天下皆曰泰伯先生士大夫爭識其面其為當世推伏也若此先生姓李氏諱觀字泰伯南城人也其實如秋其受如海外示發舒中以直正其

於道也如天焉無不覆如地焉無不載天地以萬物遂
成爲功先生以四海咸若爲功用則任公卿尸教化而
不用以夫子之道教授學者後之覽其遺書則知其所
以然曾克茂才有富國安民強兵三策易禮二論合五
十首天下傳誦及退居爲周禮致太平論并序五十一
首其敵天命又有潛書慶歷民言寄范富孫公四書長
江賦蓋不忍夫一世之傷而兩臂幾廢常語其徒其畧
曰大哉孔子吾何能稱焉顏淵曰仰之彌高鑽之彌堅

瞻之在前忽焉在後仰之彌高也則吾以為極星考之
正之舍是則無四方矣鑽之彌堅也則吾以為磐石據
之依之舍是則無安居矣瞻之在前忽焉在後也則吾
以為鬼神生之斂之舍是則無庶物矣他人之道借曰
善焉有之可也亡之可也夫子之道不可須臾去也不
聞之是無耳也不見之是無目也不言之是無口也不
學之不思之是無心無精爽也尚可以為人乎哉吾於
斯道夜而諷之矣晝而讀之矣髮斑斑而不知其疲矣

終沒吾世而已矣其語如此衆驚而萃非之先生之志益堅然則不非之不足以爲泰伯先生也先生燕申講解嚴重慎密弟子畏之有賊則對之以狀察無溢美然後進之今爲墓刻畏比神靈自祖禰以往丘蓋不言只於集中得子高墓表曰南城縣東北遠百里吾高祖之父家焉先夫人墓誌曰先君嘗學不應舉尤直信生平無所爭不識州縣廷終以不得意死又於官簿得曾祖諱某祖諱某父諱某母鄭氏始娶陳氏再娶饒氏有男

參魯三女長適陳汝翼而卒先生之生也以巳酉而卒也
也以巳亥年五十有一其卒仲秋其葬季冬實嘉祐四年
年祔先君之塋在鳳凰山足夫南城載于西漢地理志
唐屬撫州臨川國朝別建軍曰建昌縣隸焉鳳凰山在
縣西北城背之塋在麓東松檟萬株山川如畫乃真宅
也然而其抱負如此天之報之止如此其後焉有不達
者乎嗚呼先生之名大顯世之顯人及有道之士莫不
知者下至農工負販士女釋耒盡能誦其文章天子亦

聞之乃以將仕郎試太學助教就門官之末年又召入太學說書復以通州海門縣主簿祿之權管幹太學非其好也逾年以告歸歸逾月而卒臨終無他言獨執次公手以明堂制圖為託又以為三禮論未成為恨其孜孜為學者如此何哉次公夙荷教育過於強仕之年哲人既歿復何聊哉泣而銘曰

余侍先生得堯舜禹湯文武周公孔子之事甚詳皆本書詩非諸子之緒言也於是浩歎魏晉之際莽卓

之間惠慎之時聖人之道已大壞有由然及究莊生
之言今世之仁人蒿目而憂世之患不仁之人決性
命之情而號富貴焉知曾史之不為桀跖之嚆矢曰
儒者未嘗是之而余獨是之嗚呼天乎其意不在斯
乎文乎何奪先生之速哉何奪先生之速哉

盱江外集卷三